



Cuira, ils 4 da november 2024

Communicaziun a las medias

Il *digidi* – in'occurrenza per la digitalisaziun dal rumantsch per ina e scadin

Co statti cun la digitalisaziun dal rumantsch? Tge svilupps vali da priorisar e tge basegns han las Rumantschas ed ils Rumantschs en il champ digital? Da questas ed autras dumondas s'occupan las participantas ed ils participants dal *digidi*, in'occurrenza participativa per la digitalisaziun da la lingua che ha lieu ils 23 da november 2024 a Cuira.

La Lia Rumantscha è en stretg barat cun instituziuns rumantschas, vischnancas ed ulteriuras gruppas d'interess per coordinar la digitalisaziun dal rumantsch. Quai fa ella per incumbensa da la Confederaziun e dal chantun Grischun. In aspect decisiv da quest process da digitalisaziun è che mintgina e mintgin – independentamain da la savida, da la professiun u da la scolaziun – po sa participar.

Per quest motiv organisescha la Lia Rumantscha il *digidi*. La finamira è che persunas cun differentas experientschas da vita èn da la partida durant quell'occurrenza. Il *digidi* sa drizza numnadamain ad ina e scadin, e betg mo a 'profis'. Fin ussa ha il *digidi* attratg l'interess da passa 30 persunas che han in connex cun la lingua rumantscha.

Las sfidas multifaras da la digitalisaziun da la lingua

La transfurmaziun digitala pertutga la lingua rumantscha en sia totalità. Quai vul dir che mintga idiom, mintga regiun e mintga instituziun vegn influenzà da quest process. E la fin finala pertutga la digitalisaziun dal rumantsch, sco lingua naziunala, l'entira Svizra. La basa per la transfurmaziun digitala furma ina strategia che vegn elavurada actualmain da la Lia Rumantscha. Il stadi actual da la strategia vegn preschentà per l'emprima giada al *digidi*.

Durant il di han las participantas ed ils participants dal *digidi* la chaschun da s'engaschar en differentas gruppas da lavur. Ina gruppia vegn a discutir en detagl la strategia da la transfurmaziun digitala dal rumantsch. In'otra gruppia da lavur s'occupa dals basegns da las utilisadras e dals utilisaders dal Pledari Grond. Ultra da quai datti anc ina gruppia che discuta co ch'ins pudess rimnar datas digitalas rumantschas ed ina quarta gruppia tematisescha ils basegns generals en connex cun la digitalisaziun rumantscha (per ina survista da las gruppas da lavur guarda la chascha).

Tgi che ha in'idea per in'ulteriura gruppia da lavur po annunziar quai a la Lia Rumantscha fin ils 11 da november. La finamira da lavur en las gruppas è da survegnir ina survista da la situaziun actuala, da sviluppar propostas per proximas pass en ils temas correspondentes e da rimnar ideas per l'avegnir digital rumantsch. Quest di vegn concludì cun in viva communabel.



Il digidi ha lieu sonda, ils 23 da november 2024, da las 9.00 fin las 16.30 en il 08EINS Softwarehaus, Comercialstrasse 36 a Cuira. La Lia Rumantscha engrazia a l'interpresa 08EINS ch'ella metta a disposiziun las localitads. S'annunziar per l'occurrènza pon ins anc enfin ils 11 da november. Il formular d'annunzia è disponibel sin www.liarumantscha.ch.

Las gruppas da lavur durant il *digidi*:

- **transfurmaziun digitala:** discutir en detagl la strategia da la transfurmaziun digitala dal rumantsch.
- **Pledari Grond:** adattar las funcziuns e la surfatscha als standards actuals tenor ils basegns da las utilisadras e dals utilisaders.
- **corpus rumantsch:** s'organisar per rimnar datas dal rumantsch cun la finamira da crear novas purschidas e sustegnair la perscrutaziun.
- **basegns generals:** identifitgar la mancanza dal rumantsch en il mintgadi sin il champ digital.